

DOMENIE XXXII «VIE PAL AN»

Antifone di jentrade cf. Sal 87,3

Che e rivi, Signôr, denant de tô muse la mê preiere;
slungje al gno lament la tô orele.

Colete

Diu onipotent e bon di cûr,
slontane di nô dut ce che nus fâs mâl
par che, pronts cul cuarp e cu l'anime,
o podìn servîti in plene libertât.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE 2 Mac 7,1-2.9-14

Il re dal mont nus fasarà resurî par une resurezion eterne di vite.

Dal secont libri dai Macabeus

In chei dîs, al capità il câs di siet fradis che, cjapâts cun lôr mari, a forin obleâts dal re, cun scoreadis e cun flagjei, a mangjâ cjar di purcit, che e jere inibide. Un di lôr, fevelant a non di ducj, al disè: «Ce vâstu domandant e cirint di savê di nô? Nô o sin pronts a murî pluitost di lâ cuntri des leçs dai nestris vons».

Rivât al ultin respîr, il secont al disè: «Tu, disgraciât, tu nus cjolis la vite di chenti ma il re dal mont nus fasarà resurî par une resurezion eterne di vite, nô che o murin pes sôs leçs». Daûr di lui al fo torturât il tierç. Cuant che jal domandarin, al tirà fûr dal moment la lenghe e al slungjà lis mans cun coragjo e ur disè cun dignitât: «Di Diu o ài chescj tocs e, par colpe des sôs leçs, ju sbelei parcè che o sperî che lui mai tornarà a dâ». Parfin il re e chei ator di lui a restarin pal spirt di chel fantaçut, che nol bacilave gran pes torturis. Fat murî ancje chel, a tacarin a torturâ il cuart cui stes torments.

Ridusût in fin di vite, al disè: «Al è biel murî par colpe dai oms, cuant che di Diu si à la sperance che o sarin risussitâts di lui. Ma par te la resurezion no sarà pe vite».

Peraule di Diu.

SALM RESPONSORIÂL dal Salm 16

R. Si saciarin, Signôr, cjalant la tô muse.

Cjale, Signôr, la mê justizie,
sint il gno lamentâmi,
scolte la mê preiere
che no ven fûr di lavris di bausie. **R.**

Ten i miei pas su lis tôs olmis
par no che i miei pîts a triculin.
Jo ti clami, Diu gno, ma tu rispuindimi.
O soi sigûr che viers di me tu slungjis lis tôs oreli:
scolte ce che ti dîs. **R.**

Platimi ta l'ombre des tôs alis.
Jo te justizie o vuei podê cjalâ la tô muse,
cuant che mi dismôf, o vuei saciâmi dome cul cjalâti. **R.**

SECONDE LETURE 2 Ts 2,16-3,5

Il Signôr us confermi in ogni opare e peraule buine.

De seconde letare di san Pauli apuestul ai Tessalonicês

Fradis, Jesù Crist nestri Signôr in persone e Diu nestri Pari che nus à volût ben e nus à dade une consolazion eterne e une buine sperance, pal so boncûr al confuarti e al confermi i vuestris cûrs in ogni opare e peraule buine.

Pal rest, fradis, preait par nô par che la peraule dal Signôr e continui la sô corse e e vegni coronade di glorie, come che al sucêt cun vualtris, e par che o vignin liberâts dai oms fodrâts di tristerie e di inicitât. Di fat la fede no je di ducj. Ma il Signôr al è di peraule e us confermarà e us vuardarà dal trist.

Par chel che us rivuarde, o vin fiducie tal Signôr che ce che us comandin lu fasês za e lu fasarês ancje pal avignî. Il Signôr che al indreci i vuestris cûrs viers l'amôr di Diu e la pazienze di Crist. Peraule di Diu.

CJANT AL VANZELI Zn 11,25.26

R. Aleluia, aleluia.

Jo o soi la resurezion e la vite, al dîs il Signôr,
chei che a crodin in me no muriran par mai.

R. Aleluia.

VANZELI Lc 20,27-38

Diu nol è il Diu dai muarts, ma dai vîfs.

Dal vanzeli seont Luche

In chêt volte, si avvicinarin a Jesù un pôcs di saduceus, che a disin che no 'nd è resurezion, e i domandarin: «Mestri, Mosè nus à ordenât: Se un al mûr e al lasse la femine cence fruts, so fradi al scuen sposâ la vedue e dâi une dissendence a so fradi. A jerin duncje siet fradis: il prin si sposà e al murì cence fruts. Alore le cjolè il secont, e po il tierç e cussì ducj i siet a sposarin chêt vedue: e ducj a muririn cence fruts. Po e murì ancje la femine. Cheste, cuant che i muarts a resurissaran, di cui sarae femine? Parcè che le àn vude par femine ducj i siet». Jesù ur rispuindè: «I fîs di chest mont a cjolin femine e a cjolin om; ma chei che a son ritignûts degns dal mont che al vignarà e de resurezion dai muarts, no cjolin ni femine ni om. Lôr no puedin plui murî, parcè che a son compagns dai agnui, e a son fîs di Diu diventâts degns di resurî. Che i muarts po a resurissin, lu à dit ancje Mosè a rivuart dal baraçâr, là che al dîs che il Signôr al è il Diu di Abram, il Diu di Isac e il Diu di Jacop. Duncje Diu nol è il Diu dai muarts ma dai vîfs, parcè che ducj a vivin midiant di lui».

Peraule dal Signôr.

Su lis ufiertis

Cjale di bon voli, Signôr, lis ufiertis che ti presentin
par che, cuntune sante dispozizion,
o podin vê ce che o celebrin tal misteri de passion di to Fi.
Par Crist nestri Signôr.

Antifone a la comunion Sal 22,1-2

Il Signôr al è il gno pastôr: no mi manjarà nuie.
Mi fâs polsâ là che i passons a sverdein,
mi mene là che a son aghis frescjis.

Daspò de comunion

Ti ringraciìn, Signôr,
di vènus sostentâts cul to sant regâl
e o prein il to boncûr
che il to Spirt al conservi in gracie e scletece
chei che a àn ricevude la fuarce dal cîl.

Par Crist nestri Signôr.